

Perbincangan panjang lebar akan diadakan

KUALA LUMPUR, Selasa — Perdana Menteri, Datuk Seri Dr. Mahathir Mohamad akan mengadakan perbincangan panjang lebar di sebelah tengah hari dengan rakan sejawatnya di Singapura, Encik Lee Kuan Yew bila beliau melawat Kota Singa itu 17 Disember ini.

Pertemuan itu merupakan yang pertama sejak Datuk Seri Dr.

Mahathir memegang jawatan Perdana Menteri.

Kali terakhir Perdana Menteri bertemu Encik Lee ialah Mei lalu semasa menghadiri upacara pengkebumian Presiden Singapura, Encik Benjamin Sheares.

Pada masa itu Datuk Seri Dr. Mahathir memegang jawatan Timbalan Perdana Menteri.

Lawatan selama 25 jam itu termasuk acara mengunjungi presiden baru Singapura, Encik Devan Nair.

Datuk Seri Dr. Mahathir dan Encik Lee dijangka membincangkan berbagai topik kepentingan bersama dan ASEAN.

Perdana Menteri dilaporkan berkata dalam akhbar Singapura minggu lalu, perhubungan masa depan antara Malaysia dan Singapura bergantung pada kepentingan dua hala yang sedang ditanam pada masa ini.

Beliau memberitahu Berita Minggu Singapura, "Malaysia sebenarnya mahukan perhubungan dengan Singapura berkekalan baik".

Perdana Menteri juga dilaporkan berkata, masih terdapat ruang untuk memperbaiki perhubungan itu walaupun hubungan kedua negara itu sekarang memuaskan.

Beberapa isu kepentingan bersama yang belum selesai dan di bawah bidang penyelidikan Jawatankuasa Antara-Kerajaan Malaysia-Singapura (IGC).

IGC merupakan jawatankuasa yang bertanggungjawab kepada kedua Perdana Menteri itu dan bertujuan menyelesaikan masalah-masalah dua hala.

Berkekalan

Antara isu-isu tersebut ialah cadangan tambak kedua ke Singapura dan permintaan Malaysia mendapatkan tambahan tanah untuk Pangkalan TLDM di Woodlands dan juga penyerahan semula kem bekas askar Khatib di Bukit Timah.

Kedua Perdana Menteri itu juga kemungkinan membincangkan isu sensitif mengenai penguasaan ruang udara Johor.

Malaysia difahamkan cuba mendapatkan pemulangan sebahagian besar Kawasan Penerbangan Penerbangan Johor (FIR) yang sekarang dikuasai oleh Singapura.

Malaysia difahamkan mahu menguasai semula sebahagian dari ruang udara itu berikutan penambahan kelengkapan-penambahan peralatan penerbangan awam dan pembangunan Lapangan Terbang Senai di Johor Bahru.

Selain dari itu, perbincangan kedua Perdana Menteri itu juga akan menyentuh permintaan Singapura mendapatkan sebahagian tanah yang digunakan oleh Keretapi Tanah Melayu di Tanjung Pagar. Tanah itu hendak digunakan untuk Lebuh Raya Pantai Timur-Jurong dan pelabuhan kontena Singapura.

Mengenai ASEAN, Datuk Seri Dr. Mahathir dilaporkan berkata, taraf kerjasamayang wujud sekarang sangat memuaskan.

Bahan asal dari Arkib
Negara Malaysia